

SAMÞYKKT

um Lánatryggingasjóð kvenna.

1. gr.

Heiti sjóðsins

Heiti sjóðsins er Lánatryggingasjóður kvenna og er aðsetur hans hjá dómsmálaráðuneytinu, Borgartúni 26, 105 Reykjavík.

Í kynningar- og markaðsefni fyrir sjóðinn er heimilt að nota heitið Svanni-lánatryggingasjóður kvenna.

2. gr.

Hlutverk og áherslur

Hlutverk Lánatryggingasjóðs kvenna er að styðja konur til nýsköpunar og þátttöku í atvinnulífinu með því að veita ábyrgðir á lánum samkvæmt samþykkt og lánareglum sjóðsins. Skilyrði fyrir ábyrgðarveitingum er að fyrirtæki eða verkefni sé a.m.k. 50% í eigu og undir stjórn konu eða kvenna og að verkefni leiði til atvinnusköpunar.

Áherslur sjóðsins eru eftirfarandi:

- Að styðja við bakið á konum sem eiga og reka smærri fyrirtæki.
- Að stuðla að því að auka hlut kvenna sem eigendur og stjórnendur fyrirtækja.
- Að auka aðgengi kvenna að fjármagni til fyrirtækjareksturs.
- Að fjölga störfum og stuðla að nýsköpun í atvinnulífi.
- Að veita ráðgjöf til umsækjenda um ábyrgð sjóðsins á láni.
- Að hvetja jaðarhópa kvenna til þátttöku í atvinnulífinu, svo sem innflytjendur.

3. gr.

Eigendur og stofnfé

Félagsmálaráðuneyti, iðnaðarráðuneyti og Reykjavíkurborg stofnuðu Lánatryggingasjóð kvenna. Stofnfé sjóðsins var samtals 10 milljónir króna miðað við verðlag neysluvísitölu á stofndegi þann 7. apríl 1997 samkvæmt eftirfarandi skiptingu: félagsmálaráðuneyti fimm milljónir króna; iðnaðarráðuneyti tvær milljónir króna og Reykjavíkurborg þrjár milljónir króna.

Núverandi eigendur sjóðsins samkvæmt samþykkt þessari eru dómsmálaráðuneyti, atvinnuvegaráðuneyti og Reykjavíkurborg. Dómsmálaráðuneyti telst eigandi í stað félags- og húsnæðismálaráðuneytis vegna flutnings málaflökks jafnréttismála til ráðuneytisins. Atvinnuvegaráðuneyti telst eigandi í stað iðnaðarráðuneytisins vegna ábyrgðar þess á helstu málaflökkum ráðuneytisins.

4. gr.

Stjórn

Stjórn Lánatryggingasjóðs kvenna er í höndum þriggja manna stjórnar sem dómsmálaráðherra skipar til fjögurra ára í senn. Dómsmálaráðherra skipar stjórnarformann og atvinnuvegaráðuneyti og Reykjavíkurborg tilnefna einn fulltrúa hvort.

Stjórn sjóðsins skal vera sjálfstæð í störfum sínum.

5. gr.

Hlutverk stjórnar

Formaður stjórnar boðar til stjórnarfunda. Halda skal fundargerðabók um það sem gerist á stjórnarfundum. Hver stjórnarmaður getur krafist stjórnarfundar. Stjórn sjóðsins skal móta lánareglur sjóðsins og leggja undir samþykki eigenda. Stjórn sjóðsins skal útbúa matsblöð sem nota skal við mat á umsóknum.

Stjórnin ákveður sérstakar áherslur til ábyrgðarveitinga árlega en almenn áhersla skal lögð á aukna atvinnusköpun.

Stjórn sjóðsins gerir samkomulag við fjármálastofnanir um ábyrgðarveitingar. Í því skal meðal annars kveðið á um tegundir lána, lengd lána, vaxtakjör, lántökugjald og önnur gjöld og hlutdeildarskiptingu sjóðs og banka varðandi ábyrgðir. Einnig skal kveðið á um fyrirkomulag við ráðgjöf og handleiðslu til umsækjenda og ábyrgðarþega eftir því sem við á.

Mat á umsóknum er á hendi stjórnar sjóðsins og lánastofnunar en stjórn sjóðsins fjallar að mati loknu um umsóknir og tekur endanlega ákvörðun um veitingu ábyrgða í samræmi við samþykkt og lánareglur sjóðsins. Ábyrgðarveitingum skal úthlutað allt að tvisvar sinnum á ári.

6. gr.

Umsýsla Lánatryggingasjóðs kvenna

Stjórn sjóðsins getur falið öðrum umsýslu verkefnisins sem og daglegan rekstur sjóðsins. Stjórnin getur falið umsýsluaðila að koma fram fyrir hönd hans í öllum málum er varða venjulegan rekstur. Umsýsluaðila ber að veita stjórnarmönnum allar upplýsingar um starfsemi sjóðsins sem þeir kunna að óska eftir.

Stjórn getur falið umsýsluaðila að halda utan um heimasíðu verkefnisins þar sem fram koma upplýsingar um ábyrgðarveitingar og fyrirkomulag. Umsýsluaðili skal vinna í nánú samstarfi við eigendur og þær stofnanir sem sinna ráðgjöf og handleiðslu við umsækjendur og ábyrgðarþega. Fela má umsýsluaðila að útbúa kynningarefni og standa að markaðssetningu sjóðsins í samstarfi við fyrrgreinda aðila.

7. gr.

Fjármunir

Stjórn sjóðsins skal gera samkomulag við eina eða fleiri fjármálastofnanir um fyrirkomulag veitingar ábyrgðartryggingar þar sem kveðið er á um þóknun og annan umsýslukostnað.

Stjórn sjóðsins ber ábyrgð á að tryggja að varsla og ávöxtun fjármuna sjóðsins sé sem hagkvæmust og öruggust vegna þeirra ábyrgða sem samþykktar hafa verið.

8. gr.

Ábyrgð

Ábyrgð eigenda er bundin við stofnfé sjóðsins og viðbótarframlög þeirra. Óheimilt er að ákveða að heildarfjárhæð veittra ábyrgða sé hærri en staða sjóðsins er á hverjum tíma. Fjármunir sjóðsins við undirskrift samþykktar þessarar eru 70.697.214 krónur. Ef starfsemi sjóðsins verður ekki framhaldið við lok neðangreinds samningstíma verður eign hans endurgreidd eigendum í hlutfalli við upphaflegt framlag eigenda.

9. gr.

Gildistími og önnur ákvæði

Samþykkt þessi gildir fyrir tímabilið 18. september 2025 til 18. september 2029. Fyrir 1. janúar 2029 skal tekin ákvörðun um framhald starfsemi Lánatryggingasjóðs kvenna.

Samþykkt þessi er staðfest af eigendum Lánatryggingasjóðs kvenna. Eigendum er heimilt að breyta eða fella úr gildi samþykkt þessa.

Reykjavík 18. september 2025

Þorbjörg S. Guðlaugsdóttir

f.h. dómsmálaráðuneytis

Hanna Katrín Friðrik

f.h. atvinnuvegaráðuneytis

Jóna Bölg Jónsdóttir

f.h. Reykjavíkurborgar